

## Y GRAWYS 5

ESECIEL 37:1-14; SALM 130;  
RHUFEINIAID 8:6-11; IOAN 11:1-45

---

---

### ● Gweddi agoriadol

Ar ein taith at y groes  
cymerwn egwyl fer  
i'n disychedu,  
diod o ddŵr bywiol;  
bwydo ar dy air,  
mwynhau cymdeithas â thi  
a'n cymdeithion.  
Bendithia ein hamser gyda'n gilydd,  
a phan adawn y lle hwn  
bydd yn dywysydd ar y ffordd.

### ● Moliant

Arglwydd sofran,  
cyffyrddodd dy law  
esgyrn sychion ein ffydd;  
anadlodd dy air  
fywyd newydd ble roedd marwolaeth;  
cododd dy Ysbryd ni  
o ble roeddem yn gorwedd;  
daeth dy gariad â ni adre  
ac at dy groes,  
a thrwy dy ras  
maddeuwyd i ni, rydym yn rhydd.  
Halelwia!

● **Cyffes**

Mae dy faddeuant yn llwyr –  
dim llyfr nodiadau,  
dim cloch atgoffa  
i'th atgoffa o'n pechod.  
Derbynni y gyffes a gyflwynwn  
â breichiau agored  
ac yn dyner, fel yr wyt,  
yn Dad nefol cariadus,  
fe'i rhoi y naill ochr  
i'w hanghofio.  
Dim dyhead i farnu, dim chwerwder,  
dim gweld yn chwith, dim drwgdeimlad,  
ddim fel ni,  
sy'n dweud 'sori' yn ddigon hawdd  
ond sy'n ei chael yn anodd  
i faddau yn llwyr.

Maddau i ni, ein Tad,  
ein bod yn fwy parod yn aml  
i dderbyn maddeuant  
nag i faddau,  
yn fwy parod i dderbyn dy gariad  
nag i'w rannu â'r rheini  
sydd wedi'n brifo.  
Dysga ni i faddau  
fel y maddeui di.

● **Diolch**

Am ffydd y rhai  
a aeth o'n blaen  
diolchwn i ti.

Am bawb sydd wedi  
ymateb i'th gariad  
diolchwn i ti.

Am y rhai a roddodd  
eu bywyd drosot ti  
diolchwn i ti.

Ti yw'r atgyfodiad a'r bywyd,  
a bydd pawb sy'n credu ynot ti,  
er iddyn nhw brofi  
tristwch neu lawenydd heddiw,  
yn mwynhau bywyd yn ei holl lawnder  
yn dy dragwyddoldeb.